

Regional News Unit AIR Aizawl

Tuesday, June 18, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Chief Minister Pu Lalduhawma chuan thlai thar pali thlan bik chu sorkarin a lei ngei ngei dawn niin a sawi.
- Mizoram chungah dam loh thila Golden Card hmang thei mi nuai 5, sing 6, sang 1 leh 470 an awm mek.
- Nizan khan Union Home Minister Amit Shah-a kaihhruai thukhawm chuan Manipur-a venhimna dinhmun an thlirho.
- MP bial hniha thlan tlin Congress hruiatu Rahul Gandhi-a chuan a bial pakhat zawk Wayanad chhuahsanin Rae Bareilly a vawng chhunzawm dawn.



CASH CROP MARKET

Chief Minister Pu Lalduhawma chuan ZPM sorkar flagship programme thlai thar pali thlan bik lei chu an tihlawhtling ngei ngei dawn niin a sawi.

Nimin khan Chief Minister Pu Lalduhoma ho hian a pisa-ah Sawhthing lei leh hralh leh a sawngbawl chungchang Minister leh official pawimawh te'n an sawiho a. Chief Minister chuan tun atanga thla 6 velah heng thlai 4-te hi a thar chho mai tawh dawn niin a sawi a. Chumi hre reng chuan tih tur awm apiang an lo tih ve zung zung a tul a, chak taka inbuatsaih theuh turin mawhphurtute a chah a. Kuhva chingtute harsatna pawh thapui thawha an bawhzui a tul tih a tarlang baw. Kum tharah hian Mizoram in sawhthing quintal maktaduai 1 vel a thar chhuak tura ngaih a ni a. A duh duhin lei theih tura ruahmanna-Free market hmangin lei leh hralh hi kalpui zel tur a ni dawn a. Amaherawhchu market a kal tluan theih na'n leh loneituten an tharchhuah zawng zawng an hralh theih nana thil tul te an sawi a ni. Sawhthing Minimum Support Price hi January atanga May thla inkarah pek ni se tiin thutlukna an siam baw.

Thutkhawmna a kalte hian sawhthing hi a hralhna kal tluan pangngaia loneitute'n an hralh theih bak a grade hniam, process ngai chi lo awm ta se engtia kalpui tur nge ni ang tih an sawi nghal a, hemi atana Private company rintlak te thawhpui dan turte an rel a. Kuhva chingtute harsatna sutkian dan tur, Mizoram chungah processing plant siam chungchang te pawh an sawi.

Inkhawmah hian Agriculture Minister Pu PC Vanlalruata, Horticulture Minister Prof. Lalnilawma, Commerce & Industries Minister Pu F. Rodingiana, Adviser to CM Dr. KC Lalmalsawmzauva leh Secretary to CM Pu Vanlaldina Fanai, bakah official pawimawh te an tel a ni.



REFUGEES

Pathianni khan Lawngtlai district a Vathuampui khua-ah Bangladesh-a Chittagong Hill Tracts atangin raltlan 29 an lo luh belh.

Lawngtlai a kan Corr Lalngheta Ralte sawi danin raltlan 29-te hi chhungkaw 9 ami an ni a. Puitling 16 leh naupang 13 an ni. Vathuampui khua bikah hian Bangladesh raltlan mi 390 an awm mek a ni. Heti hian Lawngtlai district-a sahimna zawnga Bangladesh atanga raltlan awm zat chu 1,901 an tling ta a ni. An zinga engemawzat hi Lawngtlai district-a relief camp 12-ah awmin a dangte chu khaw 11-a an chhungte leh thiante belin an awm a ni. Bangladesh atanga raltlan rawn lutte hi Bawm hnam an ni ber a, anmahni chuan Kuki-Chin an inti a. Kuki-Chin National Army (KNA)-in Chittagong Hill Tracts-a an chenna hmuna thuneihna sang zawk an ngiat avangin Bangladesh sipaite nen an inkap deuh reng a, chumi vanga rawn raltlan an ni.

Lawngtlai district-a Bangladesh atanga raltlan 1,901 bakah Myanmar atanga raltlan 5,922 nen an vaiin raltan 7,823 Lawngtlai District ah an awm mek a ni.

<><><>

UNION MOS

NDA sorkar thara Minister of State for Home Affairs a lak luh tak Bandi Sanjay Kumar chuan vawiin hian Kolasib a tlawh ang.

Vawiin hian Prime Minister Narendra Modi chuan PM-Kisan hnuai a kuthnathawktute hnenah installment 17-na atan cheng vaibelchhe 20,000 a sem chhuak dawn a. Prime Minister-in PM-Kisan dawngtu kuthnathawktu mi vaibelchhe 9 leh nuai 26 hnena pawisa a semna hun hi Uttar Pradesh a Varanasi khawpui a huaihawt tur a ni a. Union Ministry of Agruculture and Farmers Welfare leh Uttar Pradesh sorkar buatsaih tur a ni a. Bandi Sanjay Kumar hian Kolasib KVK hmunah he hun hi a lo hmanpui ve dawn a ni. Hei bakah hian Kumar hian loneitute leh sorkar official-te a kawm bawk ang a. Krishi Sakhis certificate a sem nghal bawk ang.

<><><>

GOLDEN CARD

Mizoram chhungah dam loh thila Golden Card hmang thei mi nuai 5, sing 6, sang 1 leh 470 an awm mek.

Thudawn danin Golden Card nei chhungkaw nuai 1, sing 9, sang 7 leh 334 an awm a. Golden Card nei zinga mi 17, 241 te chuan tangkai taka hmang tawhin, mi 28,003 atangin bill a lut tawh bawk a ni. Golden card hmang tamna ber district chu Aizawl niin, Champhai-in a dawt a, Siaha district chu Golden card neih tlemna niin mi 27,688 in an nei bawk a ni. Golden card hi siam hun chhung bituk a awm hran lo a, sorkar damdawi-in zawng zawngah siam tir theih niin, Mizoram State Health Care Society Office, Dinthar leh Common Service Centre-ah siamtir theih a ni bawk a ni. Golden Card nei tur hian NFSA (ration card eng leh pawl nei) chhungkua, National Health Authority (NHA data lut chinte) chuan golden card hi an nei thei a. Socio economic caste census (SECC) 2011 deprived list leh RSBY 2018 list a chuang zinga chhungkaw member pakhat talin golden card an lo siam tawh a nih chuan Golden Card nei thei chhungkua-ah chhiarzawm an ni bawk a ni.

<><><>

WALKATHON

Health Minister Pi Lalrinpuii chuan Mizoramin India rama pakhatna dinhmun a chelhna hrang hrang - HIV kai zat, cancer natna vei zat leh zuk leh hmuam ti zat te chu a chhuanawm lo hle a ni a ti.

Nimina World No Tobacco Day puala Millennium Centre leh Vanapa Hall inkara zuk leh hmuam dona kawngzawh, Walkathon a hmanpuinaah he thu hi Minister chuan a sawi a. Vawiin World No Tobacco Day chu zuk leh hmuam ti thinten simna ni atana an hman a a duhsak thu a sawi a, a la ti lo te ti thar lo tura intiam theuh turin sawm bawk a ni.

World No Tobacco Day puala hun hman hi NHM Mission Director Dr. Eric Zomawian kaihruiin zuk leh hmuam ti lo tura intiamna hun a hmanpui a. Vanapa Hall kawtah kharna programme tawi hman a ni. World No Tobacco Day pual walkathon hi National Health Mission, National Tobacco Control Programme (NTCP) leh Comprehensive Primary Health Care (CPHC) tangkawpin an buatsaih a ni.



GOODS SHORTAGE

June ni 8-a Myanmar sipaite'n Tahan khawpui leh Zokhawthar insumdawna kawngpui a Run lei an bomb chhiat avangin Myanmar bungrua a vang a, a man a to hle bawk.

Zokhawthar khawtlang hruaitute'n an sawi danin Myanmar sipaite'n Tahan, Tedim leh Zokhawthar inkara Run lui chung a lei dawh an bomb chhiat avangin helai kawngah hian bungrua phurh tlang theih a ni lova. Kawng hla zawk Falam lam atangin bungrua a lo thleng tawh tho na-in a lo thlen har avang leh a phurh man a to avangin eichawp leh in tur lam chite bakah electronic bungruate chu a man a sang hle a. Ramri hrula chengte tan harsatna a siam mek a ni. Bungrua hi a thlen tlai bakah a hma ai chuan a thleng tlem hrim hrim a, a phurhna kawng a kual avangin a phurh man a to a, chu chuang bungraw man hi a tito niin khawtlang hruaitute chuan an sawi a ni.

Myanmar ram atanga Mizorama thil chi hrang hrang tam ber lakluhna Kalaymyo khawpui a Tahan khua hi Mizo tawng hmang tamna khawpui a ni a. Tam tak hi kum 1948-a British sorkar atanga Burma-in zalenna a hmuh hlim leh a hnu lama Mizoram atanga pem chhote an ni a. Tahan khawpui a chengte hi za zela 99 zet chu Kristian an ni a. Myanmar ram pumpui a cheng za zela 90 chu Buddhist an ni thung.



ASF

Nimin khan African Swine Fever (ASF) vei vawk 78 a thih belh leh avangin Mizoram puma he vawk pulhri leng avanga kumina vawk thi zat chu 2,257 a tling ta.

Animal Husbandry and Veterinary department hotute'n an sawi danin ASF vawk pulhri darh zel tur venna atan nimin khan vawk 30 tihlum a ni bawk a. Kumina vawk pulhri darh tur venna atana vawk tihlum tawh zawng zawng hi 4,672 a tling tawh a ni. Nimina vawk thite hi Aizawl, Saitual, Khawzawl, Serchhip leh Kolasib a thite a ni a. Aizawl district-a Falkawn khua-ah vawk 44 lai a thi a, Serchhip district a Baktawng khua-ah 10 a thi bawk.

Nimina vawk suatte hi Serchhip leh Aizawl district-a khaw pali amite a ni a. Pathianni a vawk 98 zet an suatna, Chhingehhip khua-ah hian niminah vawk 23 zet an suat leh a ni.



UNION HM ON MANIPUR

Nizan khan Union Home Minister Amit Shah-a kaihhruai thukhawm chuan Manipur-a venhimna dinhmun an thlirho a. He hunah hian Union Home Minister chuan Manipura remna leh muanna a awm theih nan central force te dah a tul thu sawiin a tul anih chuan sipaite hi dahluh belh a ni ang a ti a. Tupawh tharum thawh hmangte chu dan hnuaiah na taka an chungah hma la turin a hrilh bawk a ni.

Pu Shah-a chuan Prime Minister Narendra Modia kaihhruaina hnuaiah sawrkar laipui chuan Manipur mipuite himna turin theihtawp an chhuah thu a sawi a. Manipur Chief Secretary chu buaina chhuak avanga awmhmun sawn mipui ten hriselna leh zirna lamah enkawlna tha an dawn ngei theih nan hma la tur leh an indinthar lehna kawngah tha tak pui turin a ti a.

Union Home Ministry chuan Meitei leh Kuki hruaitute pawh a kawm dawn tih sawiin hnam pahnihte inkar siamthate leh an tum a ti a. Sawrkar laipui chuan Manipur sawrkarin venhimna hna a thawhnaah a thlawp zel a ni a ti bawk.

Nimin inhmukhawmah hian Union Home Secretary Ajay Bhalla, Intelligence Bureau Chief Tapan Deka, Chief of Army Staff General Manoj Pandey, Chief of Army Staff (Designate) General Upendra Dwivedi, Manipur DGP Rajiv Singh leh sawrkar hotu dangte an tel a ni.



CONGRESSNMP

MP bial hniha thlan flin Congress hruaitu Rahul Gandhi-a chuan a bial pakhat zawk Wayanad chhuahsanin Rae Bareilly a vawng chhunzawm dawn a. A chhuahsan tak Kerala-a Wayanad bialah hian a farnu leh Congress hruaitu Priyanka Gandhi a ding thung ang. Congress President Mallikarjun Kharge chuan nimin khan he thu hi chanchinbumite hmaah sawiin rae Baely bial-ah Rahul Gandhi chu awm chhunzawm se tia an rel thu sawiin he bial hi an chhungkua nen thuk taka inzawmna nei an ni a ti.

